

SHAAN E AHL E BAIT

Manqabat e Ahle Bait

Manqabat e Imam Hussain

Manqabat e Shuhada e Karbala

Salaam Bargaah e Ahle Bait

Compiled By

Sayed Khalil Noorie
(Muballighe Sunni Dawat e Islami)

Name of Book : **Shaan e Ahle Bait**


Compiled By : **Sayed Khalil Noorie**
(Muballigh-e-Sunni Dawate Islami)

No. of Pages : 60

Presented By : www.naatsharif.in

E-mail Us At : info@naatsharif.in

Follow Us On Instagram  : [@naatsharif.in](https://www.instagram.com/naatsharif.in)



NAAT SHARIF

For Hamd | Naat | Manqabat | Salaam | Lyrics

Visit: www.naatsharif.in

INDEX

Sr.	Contents	P.No.
1	INTRODUCTION	5
2	DUROOD E AHLE BAIT	10
3	BAAGH E JANNAT KE HAIN BEHRE MADHA KHAAN E AHLE BAIT	11
4	HUSSAIN KE NAAM E PAAK PAR AAJ NOORI MELA JO SAJ GAYA HAI	13
5	AAYA NA HOGA ISS TARHA HUSN O SHABAB RAIT PAR	14
6	SHUJA'AT NAAZ KARTI HAI JALAALAT NAAZ KARTI HAI	15
7	HUMARE HAI REHBAR HUSSAIN IBNE HAIDAR	16
8	FATIMA ZAHRA KI CHAADAR KA HAI SAAYA MOHTARAM	17
9	AHLE BAIT E PAAK PAR YE JAAN BHI QURBAN HAI	18
10	HUSSAIN NAAM HAI ALLAH KI INAAYAT KA	19
11	ISLAM NE HAI PAAYI FAZEELAT HUSSAIN SE	20
12	BAYAAN HO KIS TARAH PYAARE FAZEELAT SHAH E KARBAL KI	21
13	WOH KAUN JIS KA KE ASL AL USOOL ZINDA HAI	22
14	YAZEED MAR GAYA MERA HUSSAIN ZINDA HAI	23
15	AHLE BAIT E PAAK KI ULFAT MERA IMAAN HAI	25
16	SAR ZAMEEN E KARBALA HAI ZULM KA BAZAAR HAI	26
17	YEH BAAT KIS QADAR HASEEN JO KEH GAYE MOINUDDIN	27
18	MERA MAULA MAULA HUSAIN HAI	29
19	MERA HUSSAIN BAGH E NABUWAT KA PHOOL HAI	31
20	SAR BULANDI KI RIWAAYAT SAR KATAANE SE CHALI	32
21	SHERE KHUDA KA SHER HAI MERE HUSSAIN HAI	33
22	ZAHRA KE PYAARE LAAL SE HAIDAR KE CHAIN SE	35
23	ZAMEEN O AASMAAN MEIN HUSSAIN SA KOI NAHI	36
24	HUSSAIN JAISA SHAHEED E AAZAM JAHAN MEIN KOI HUA NAHI HAI	37
25	KYA DEEN E MUSTAFA KO JAGAAYA HUSSAIN NE	38

Sr.	Contents	P.No.
26	KYA HUSNE IFTIKHAR HAI YAADE HUSSAIN MEIN	39
27	REHMATE KIBRIYA HUSSAIN JALWAYE MUSTAFA HUSSAIN	40
28	HUM KYA KAHE KE KYUN HUME PYARA HUSSAIN HAI	41
29	KHUDA SHANASI O KHUD AAGAH HUSSAIN SE HAI	42
30	QARAAR E JAAN O DIL E MUSTAFA HUSSAIN SE HAI	43
31	YE DIL BHI HUSSANI HAI YE JAAN BHI HUSSAINI HAI	44
32	ZAMEEN FALAK MAAH O AKHTAR HUSSAIN WALE HAI	45
33	HADEESE ISHQ KA JALWA HUSSAIN SE LELO	46
34	JAAN MANGO MAIN DIL NAHI DUNGA	47
35	MAIN KHUSH NASEEB HOON MUJH PE KARAM HUSSAIN KA HAI	48
36	KHANDA PESHANI SE HAR SADMA UTHATE HAIN HUSSAIN	49
37	LIBAAS HAI PHATA HUA GUBAAR MEIN ATA HUA	50
38	SAYYED NE KARBALA MEIN WAADE NIBHA DIYE HAI	52
39	KAISE KAROON BAYAAN HIKAAAYAT HUSSAIN KI	53
40	RAAHE KHUDA MEIN SHAUQ SE SAR KO KATA GAYE HUSSAIN	54
41	ISLAM TUJHI SE ZINDA HAI	55
42	TUMHARE SAJDE KO KAABA SALAM KEHTA HAI	56
43	MERE HUSSAIN TUJHE SALAAM	57
44	KARBALA KE JAAN NISAARON KO SALAAM	58
45	LAALE KHATOON E JANNAT PE LAAKHON SALAAM	59
46	AALE AHMED KI AZMAT PE LAAKHON SALAAM	60



Introduction

**Ahle Sunnat Ka Hai Beda Paar Ashaab e Huzoor
Najm Hai Aur Naau Hai 'Itrat Rasoolullah Ki**

**Paarhaa-e-Suhuf Gunch-haa-e-Qudus
Ahle Bait e Nubuwwat Pe Laakhon Salaam.
(Imaam e Ahle Sunnat)**

عَنِ ابْنِ عَبَّاسٍ رَضِيَ اللَّهُ عَنْهُمَا قَالَ: لَمَّا نَزَلَتْ هَذِهِ الْآيَةُ: قُلْ لَا أَسْأَلُكُمْ عَلَيْهِ أَجْرًا إِلَّا الْمَوَدَّةَ فِي الْقُرْبَى (الشورى ٢٣: ٢٤) قَالُوا يَا رَسُولَ اللَّهِ، مَنْ قَرَابَتِكَ هَؤُلَاءِ الَّذِينَ وَجَبَتْ عَلَيْنَا مَوَدَّتُهُمْ؟ قَالَ: عَلَيَّ وَفَاطِمَةُ وَابْنَاهُمَا. (مرواه الطبرانی)

Hazrat Abdullah bin Abbas RadiAllahu Anhuma se marvi hai ki jab ye aayat “Farma dijiye main is Tablig e Risaalat par tum se koi ujrati nahin mangta magar (Apni aur Allah ki) qaraabat wa qurbat se mohabbat (chahta hun)” nazil hui, to Sahaba e Kiraam RadiAllahu Anhum ne arz kiya: Ya Rasoolallah! Aap ke qaraabat daar kaun hain jin ki mohabbat hum par wajib hai? to Aap Sallallahu ta’ala alaihi wa sallam ne Farmaya: Ali, Fatima aur un ke do bete (Hasan wa Hussain).”

(Is Hadees ko Imam Tabrani ne riwayat kiya hai.)

عَنِ الْعَبَّاسِ بْنِ عَبْدِ الْمُطَّلِبِ رَضِيَ اللَّهُ عَنْهُمَا قَالَ: قُلْتُ: يَا رَسُولَ اللَّهِ، إِنَّ قُرَيْشًا إِذَا لَقِيَ بَعْضُهُمْ بَعْضًا لَقَوْهُمْ بِبَشَرٍ حَسَنٍ، وَإِذَا لَقُونَا لَقُونَا بِوَجْوهٍ لَا نَعْرِفُهَا، قَالَ: فَغَضِبَ النَّبِيُّ صَلَّى اللَّهُ تَعَالَى عَلَيْهِ وَسَلَّمَ غَضَبًا شَدِيدًا، وَقَالَ: وَالَّذِي نَفْسِي بِيَدِهِ، لَا يَدْخُلُ قَلْبَ رَجُلٍ الْإِيمَانُ حَتَّى يُحِبُّكُمْ لِلَّهِ وَلِرَسُولِهِ وَلِقَرَاتِي، مَرَوَاهُ أَحْمَدُ وَالنَّسَائِيُّ وَالْحَاكِمُ وَالْبُزَّارُ۔
وَفِي مِرْوَايَةٍ: قَالَ: وَاللَّهِ، لَا يَدْخُلُ قَلْبَ امْرِئٍ إِيْمَانٌ حَتَّى يُحِبُّكُمْ لِلَّهِ وَلِقَرَاتِي۔

Hazrat Abbas Bin Abdul Muttalib Radiallahu Anhuma Se Marwi Hai Ki Maine Bargaah E Risaalat Sallallahu Ta'ala Alaihi Wa Sallam Me Arz Kiya: Ya Rasoolallah! Quraish Jab Aapas Mein Milte Hain To Haseen Muskurate Chehron Se Milte Hain Aur Jab Hum Se Milte Hain To Aise Chehron Se Milte Hain Jinhin Hum Nahin Jante (yaani Jazbaat Se Aari Chehron Ke Saath) Hazrat Abbas RadiAllahu Anhu Farmate Hain Huzoor Nabi E Akram Sallallahu Ta'ala Alaihi Wa Sallam Ye Sun Kar Shadeed Jalaal Mein Aa Gaye Aur Farmaya: Us Zaat Ki Qasam Jis Ke Qabaza E Qudrat Mein Meri Jaan Hai! Kisi Bhi Shakhs Ke Dil Mein Us Waqt Tak Imaan Dakhil Nahin Ho Sakta Jab Tak Allah Ta'ala Aur Us Ke Rasool Sallallahu Ta'ala Alaihi Wa Sallam Aur Meri Qaraabat Dari Ki Khatir Tum Se Mohabbat Na Kare."ise Imaam Ahmed, Nisa'i, Hakim Aur Bazaar Ne Riwayat Kiya Hai.

Aik Riwayat Me Hai Ki Aap Sallallahu Ta'ala Alaihi Wa Sallam Ne Farmaya: "khuda Ki Qasam! Kisi Shakhs Ke Dil Mein Us Waqt Tak Imaan Dakhil Na Hoga Jab Tak Ki Wo Allah Ta'ala Aur Meri Qaraabat Ki Wajah Se Tum Se Mohabbat Na Kare."

عَنِ ابْنِ مَسْعُودٍ رَضِيَ اللَّهُ عَنْهُ عَنِ النَّبِيِّ صَلَّى اللَّهُ عَلَيْهِ وَسَلَّمَ قَالَ: حُبُّ آلِ مُحَمَّدٍ يَوْمًا،
خَيْرٌ مِنْ عِبَادَةِ سَنَةٍ وَمَنْ مَاتَ عَلَيْهِ دَخَلَ الْجَنَّةَ - رَوَاهُ الدَّيْلَمِيُّ

Hazrat Abdullah Bin Maso'od Radiallahu Ta'ala Anhu
Huzoor Nabi E Akram Sallallahu Ta'ala Alaihi Wa Sallam Se
Riwayat Karte Hain Ki Aap Sallallahu Ta'ala Alaihi Wa
Sallam Ne Farmaya: Ahle Bait E Mustafa Sallallahu Ta'ala
Alaihi Wa Sallam Ki Aik Din Ki Mohabbat Pure Saal Ki
Ibaadat Se Behtar Hai Aur Jo Isi Mohabbat Par Faut Huwa
To Wo Jannat Mein Dakhil Ho Gaya.”

Is Hadees Ko Imam Dailami Ne Riwayat Kiya Hai.

عَنْ عَبْدِ الرَّحْمَنِ بْنِ أَبِي لَيْلَى رَضِيَ اللَّهُ عَنْهُ عَنِ أَبِيهِ قَالَ: قَالَ رَسُولُ اللَّهِ صَلَّى اللَّهُ عَلَيْهِ وَآلِهِ
وَسَلَّمَ: لَا يَوْمُنُ عَبْدٌ حَتَّى أَكُونَ أَحَبَّ إِلَيْهِ مِنْ نَفْسِهِ وَأَهْلِي أَحَبُّ إِلَيْهِ مِنْ أَهْلِهِ وَعِترتي أَحَبُّ
إِلَيْهِ وَعِترتي أَحَبُّ إِلَيْهِ مِنْ عِترته، وَذَاتِي أَحَبُّ إِلَيْهِ مِنْ ذَاتِهِ - رَوَاهُ الطَّبْرَانِيُّ وَابْنُ أَبِي هَاشِمٍ

Hazrat Abdul Rahman Bin Abi Laila Radiallahu Anhu
Apne Waalid Se Riwayat Karte Hain Ki Huzoor Nabi E Akram
Sallallahu Alaihi Wa Aalihi Wa Sallam Ne Farmaya: Koi
Banda Us Waqt Tak Momin Nahi Ho Sakta Jab Tak Ki Main
Us Ke Nazdeek Us Ki Jaan Se Bhi Mehboob Tar Na Ho Jaaun
Aur Mere Ahle Bait Use Us Ke Ahle Khana Se Mehboob Tar
Na Ho Jaayen Aur Meri Aulaad Use Apni Aulaad Se Badh Kar
Mehboob Na Ho Jaaye Aur Meri Zaat Use Apni Zaat Se
Mehboob Tar Na Ho Jaye.

(Ise Imam Tibrani Aur Baihaqi Ne Riwayat Kiya Hai.)

أَلَا وَمَنْ مَّاتَ عَلَى حُبِّ آلِ مُحَمَّدٍ مَاتَ مُؤْمِنًا۔

Aur Farmaya Ki Jo Mohabbat E Ahl E Bait Me Faut Hoga Wo Momin Faut Hoga.

Alhamdulillah Ye Ahadees Humein Batati Hai Ke Ahle Bait Ki Mohabbat Hi Imaan Hai Aur Agar Ahle Bait Ki Mohabbat Humare Dilon Mein Nahi Hai To Phir Humare Dil Mein Imaan Dakhil Bhi Nahi Ho Sakta. Ahle Bait Ki Mohabbat Badhane Ka Jo Zariya Hai Woh Do Hai, Ek Ye Ki Ahle Bait E Athaar Ki Seerat Ko Padh Kar Ke Unki Zindagi Ko Apne Liye Uswa Banaye Role Model Banaye Aur Dusra Ye Ki Unka Tazkira Zyada Kare Unki Madho Sana Zyada Kare Aur Unke Manaaqib Kasrat Se Padhe Taake Humare Quloob Mein Bhi Unki Mohabbat Dakhil Ho Aur Humari Aane Wali Naslein Bhi Is Mohabbat Se Behramand Ho Sake.

Is Kitaab "**Shaan E Ahle Bait**" Ke Zariye Se Qarieen In Sha Allah Apne Quloob Mein Mohabbate Ahle Bait Ka Izaafa Payenge. Iske Shaaya Karne Ka Maqsad Yahi Hai Ke Ahle Bait Ki Ulfat Aur Ahle Bait Ki Mohabbat Humare Seenon Mein Samaaye. Main Is Kitaab Ke Compile Karne Ke Liye Biraadare Giraami Qadr **Janab Sayed Khalil Noorie Sahab Muballighe Sunni Dawate Islami** Ko Mubarakbaad Pesh Karta Hu Aur Qarieen Se Guzarish Karta Hu Ke Ise Khoob Khoob Aam Kare.

لِيْ خَمْسَةً أُطْفِئُ بِهَا حَرَّ الْوُبَاءِ الْحَاطِمَةِ
الْمُصْطَفَى وَالْمُرْتَضَى وَابْنَاهُمَا وَالْفَاطِمَةُ

Mere Liye Paanch Hastiyan (wasila) Hain Jin Ke Zariye Main
Tabah Karne Wali Aag Ko Bujhata Hun
Ek Mustafa Hain, Ek Murtaza Hain, Do Un Ke Bete Hain, Ek
Fatima Hain.

مَا بَعْدَهُمْ مِّنْ نَّسْلِهِمْ قَدْ جَاءَنِي مِنْ قِبَلِهِمْ
الْعَابِدُ وَالْبَاقِرُ وَالصَّادِقُ وَالْكَاطِمُ

Aur Un Ki Aulad E Mubaraka (wasila) Hain Jo Hamare Paas Un
Ki Taraf Se Tashreef Laaye.
Sayyidna Imam Zainul Aabideen, Sayyidna Imam Muhammed Baaqir,
Sayyidna Imam Jaafar Sadiq Aur Sayyidna Imam Moosa Kazim.

ثُمَّ الرِّضَا ثُمَّ التَّقِيُّ ثُمَّ النَّقِيُّ ثُمَّ عَسْكَرِي
ثُمَّ مَهْدِي هَادِيًا حَضَرْتُ إِمَامَ الْخَاتِمَةِ

Phir Sayyidna Imam Ali Raza, Sayyidna Imam Muhammed
Taqi, Sayyidna Imam Ali Naqi, Sayyidna Imam Hasan Askari.
Aur Sab Se Aakhir Me Sayyidna Imam Muhammed Mahdi.

رِضْوَانُ اللَّهِ تَعَالَى عَلَيْهِمْ أَجْمَعِينَ

Faqeer e Qadri Gadaa e Panjatan Paak
Sayed Mohammad Qadri
(Khadim Sunni Dawate Islami)

DUROOD E AHLE BAIT

Allahumma Salle Ala Sayyidna Wa Maulana Muhammad

Wa Ala Sayyidna Aliyyun Wa Sayyadatina Fatima

Wa Sayyadatina Zainab Wa Sayyidina Hasan

Wa Sayyidina Hussain Wa Ala Aalihi

Wa Sahbihi Wa Baarik Wa Sallim

Pyaare Nabi Ki Zaat Par Rab Ka Durood Hai
Sarkaare Do Jahaan Par Sab Ka Durood Hai

Padhte Hai Gar Durood To Milta Sawaab Hai
Bheje Agar Salaam To Aata Jawaab Hai

Zahra Pe Bhejte Jo Durood o Salaam Hai
Woh Sachche Ghulame Mustafa Hai Nek Naam Hai

Jannat Mein Fatima Ki Kaneeze Jaha Rahe
Ya Rab Meri Dua Hai Meri Maa Bhi Waha Rahe

Allah Ke Sher Haidare Karraar Par Durood
Hazrat Hasan Hussain Ke Kirdaar Par Durood

Zainab ki Bargaah Mein Salaam e Niyaz Hai
Jo Murtaza Ki Laadli Zahra Ka Naaz Hai



BAAGH E JANNAT KE HAIN BEHRE MADHA KHAAN-E-AHLE BAIT

Ustad e Zaman Hazrat Allama Hasan Raza Khan Alahir rehma.

Baagh e Jannat Ke Hain Behre Madha khaan e Ahle Bait
Tum Ko Muzda Naar Ka Aye Dushmanaan e Ahle Bait

Kis Zabaan Se Ho Bayaan Izzo Shaan e Ahle Bait
Madha Goye Mustafa Hai Madha Khaan e Ahle Bait

Unki Paaki Ka Khuda e Paak Karta Hai Bayaan
Aaya e Tat-heer Se Zaahir Hai Shaan e Ahle Bait

Jin Ke Ghar Mein Be Ijaazat Jibraeel Aate Nahi
Qadr Waale Jaante Hain Qadr o Shaan e Ahle bait

Ramz Ka Maidan Bana Hai Jalwa Gaahe Husn o Ishq
Karbala Mein Ho Raha Hai Imtihaan e Ahle Bait

Phool Zakhmon Ke Khilaaye Hai Hawa e Dost Ne
Khoon Se Seencha Gaya Hai Gulsitaan e Ahle bait

Hoore Karti Hai Aroosaane Shahadat Ka Singhar
Khoob Roo Dulha Bana Hai Har Jawaane Ahle Bait

Jumma ka Din Hai Kitaab e Zeest ki Tai Kar Ke Aaj
Khelte Hai Jaan Par Shehzadgaan e Ahle Bait

Aye Shabaab e Fasl e Gul Ye Chal Gayi Kaisi Hawa
Kat Raha Hai Lehlahata Bostan e Ahle Bait

Kis Shaqi Ki Hai Huqumat Haaye Kiya Andher Hai
Din Dahaade Lut Raha Hai Karwaan e Ahle Bait

Khushk Ho Jaa Khaak Ho Kar Khaak Mein Mil Jaa Furaat
Khaak Tujh Par Dekh To Sookhi Zabaan e Ahle Bait

Khaak Par Abbas o Usman e Alam Bardaar Hai
Bekasi Ab Kaun Uthayega Nishaan e Ahle Bait

Teri Qudrat Jaanwar Tak Aab Se Sairaab Hai
Aur Pyaas Ki Shiddat Mein Tadpe Bezabaan e Ahle Bait

Qafila Saalaar e Manzil Ko Chale Hai Sonp Kar
Waaris e Be Waarisa Ko Kaarwaan e Ahle Bait

Fatima Ke Laadle Ka Aakhri Deedar Hai
Hashr Ka Hangama Barpa Hai Mayaan e Ahle Bait

Waqt e Aakhir Keh Raha Hai Khaak Mein Milta Suhaag
Ke Lo Salaam e Aakhri Aye Bewgaan e Ahle Bait

Kis Maze Ki Lazzate Hai Aabe Taige Yaar Mein
Khaak o Khoon Mein Laut-te Hai Tishnagaan e Ahle Bait

Baaghe Jannat Chhod Kar Aaye Hai Mehboob e Khuda
Aye Zahe Qismat Tumhari Kushtgaane Ahle Bait

Hoore Be Parda Nikal Aayi Hai Sar Khole Hue
Aaj Kaisa Hashr Hai Bar Ba Mayaane Ahle Bait

Koi Kyun Pooche Kisi Ko Kya Garaz Aye Be Kasi
Aaj Kaisa Hai Mareez e Neem Jaane Ahle Bait

Ghar Lutaana Jaan Dena Koi Tujh Se Seekh Jaaye
Jaane Aalam Ho Fida Aye Khaandaane Ahle Bait

Sar Shaheedane Muhabbat Ke Hai Nezon Par Buland
Aur Oonchi Ki Khuda Ne Qadro Shaane Ahle Bait

Daulate Deedar Paayi Paak Jaane Bech Kar
Karbala Mein Khoob Hi Chamki Dukaane Ahle Bait

Zakhm Khaane Ko To Aabe Taig Peene Ko Diya
Khoob Daawat Ki Bula Kar Dushmanane Ahle Bait

Apna Sauda Bech Kar Bazaar Soona Kar Gaye
Kaun Si Basti Basaayi Taajraan e Ahle bait

Ho Gayi Tehqeeq Eid e Deed Aabe Taig Se
Apne Roze Kholte Hai Saaimaan e Ahle Bait

Ahle Baite Paak Se Gustakhiyaan Be Baakiyaan
Laa'natullahi Alaikum Dushmanaane Ahle Bait

Be Adab Gustaakh Firqe Ko Sunaade Aye Hasan
Yoon Kaha Karte Hai Sunni Daastan e Ahle Bait.

HUSSAIN KE NAAM-E-PAAK PAR AAJ NOORI MELA JO SAJ GAYA HAI

Hazrat Sayed Shah Aale Rasool Hasnain Nazmi Miyaan Barkaati Alaihir Rehma

Hussain Ke Naam e Paak Par Aaj Noori Mela Jo Saj Gaya Hai
Ye Noor e Ahmad Ka Hai Tasadduq Har Ek Noorie Bana Hua Hai

Hai Noor Hi Noor Khandaan e Rasool e Aazam Ka Bacha Bacha
Tahaarat e Ahle Bait Ki To Qur'an Tasdeeq Kar Raha Hai

Tahaffuz e Deen Ka Paas Unko Shaheed Hone Ki Aas Unko
Hussain Waale Ye Jaante Hai Khuda Ka Waada Bohot Bada Hai

Dar e Nabi Par Hussain Aaye Hai Arz Karne Salaam e Rukhsat
Lipat Lipat Kar Mazaar Se Ab Nawasa Nana Ka Ro Raha Hai

Nabi Ka Ye Laadla Nawasa Khada Hai Maidaan Mein Bhuka Pyasa
Wo Jis Ka Kausar Pe Hai Ijaara Usi Ka Sukha Hua Gala Hai

Yazeediyon Ko Pare Hataaye Furaat Par Wo Imaam Aaye
Magar Ye Paani Piye To Kaise Khayaal Zainab Ka Aa Gaya Hai

Bhatije Bete Hai Girte Jaate Jigar Ke Tukde Hai Kat-te Jaate
Hussain Aage Hai Badhte Jaate Rawaa Jinaa Ko Ye Qafila Hai

Humari Saari Namaze Qurban Us Ek Sajde Ki Azmaton Par
Wo Sajda Jo Fatima Ke Bete Ne Qarbala Mein Ada Kiya Hai

Khuda Ke Raste Mein Ghar Lutana Hamesha Haq Ka Hi Sath Dena
Ye Wo Sabak Hai Hussain Ne Jo Gala Kata Ke Hume Diya Hai

Hussain Ka Naam Aur Maatam Nahi Hai Ahle Sunan Ka Shewa,
Shaheed Marte Nahi Hai Nazmi Qur'an Ailan Kar Raha Hai

AAYA NA HOGA ISS TARHA HUSN O SHABAB RAIT PAR

(Hazrat Sayed Hussain Ali Adeeb Raipuri Alaihir Rehma)

Aaya Na Hoga Is Tarha Husn o Shabaab Rait Par
Gulshan e Fatima Ke The Saare Gulaab Rait Par.

Jaan e Batool Ke Siwa Koi Nahin Khila Saka
Qatra e Aab Ke Baghair Itne Ghulaab Rait Par.

Ishq Main Kiya Lutaiye Ishq Mein Kiya Bachaiye
Aale Nabi Ne Likh Diya Saara Nisaab Rait Par.

Jitne Sawaal Ishq Ne Aal e Rasool Se Kiye
Ek Ke Baad Ek Diye Saare Jawaab Rait Par.

Tarse Hussain Aab Ko Main Jo Kahoon To Be Adab
Lam Se Lab e Hussain Ko Tarsa Hai Aab Rait Par.

Lazzat e Sozish e Bilaal Shauk e Shahadat e Hussain
Jis Ne Liya Yoon Hi Liya Apna Khitaab Rait Par

Aale Nabi Ka Kaam Tha Aale Nabi Hi Kar Gaye
Koi Na Likh Saka Adeeb Aisi Kitaab Rait Par



SHUJA'AT NAAZ KARTI HAI JALAALAT NAAZ KARTI HAI

Hazrat Mufti Akhtar Raza Khan Azhari Tajushshari'ah Alaihir Rehma

Shuja'at Naaz Karti Hai Jalaalat Naaz Karti Hai
Woh Sultan e Zamaan Hai Un Pe Shaukat Naaz Karti Hai

Sadaqat Naaz Karti Amaanat Naaz Karti Hai
Hamiyyat Naaz Karti Hai Murawwat Naaz Karti Hai

Shah e Khubaan Pe Har Khoobi o Khaslat Naaz Karti Hai
Kareem Aise Hai Woh Un Par Karaamat Naaz Karti hai

Jahaan e Husn Mein Bhi Kuch Niraali Shaan Hai Unki
Nabi Ke Gul Pe Gulzaaron Ki Zeenat Naaz Karti Hai

Shehenshahe Shaheedaan Ho Anokhi Shaan Wale Ho
Hussain Ibne Ali Tum Par Shahadat Naaz Karti Hai

Bitha Kar Shaana e Aqdas Pe Kar Di Shaan Do Baala
Nabi Ke Laadlon Par Har Fazeelat Naaz Karti Hai

Fidaayi Hoon To Kis Ka Hoon Koi Dekhe Meri Qismat
Qadam Par Jis Hussain Ke Jaane Tal'at Naaz karti Hai

Khuda Ke Fazl Se Akhtar Main Unka Naam Lewa Hoon
Main Hoon Qismat Pe Naaza Mujh Pe Qismat Naaz Karti Hai



HUMARE HAI REHBAR HUSSAIN IBNE HAIDAR

**Hafiz o Qari Hazrat Allama Shakir Noorie Sahab Qibla
(Ameer e Sunni Dawate e Islami)**

Humare Hai Rehbar Hussain Ibne Haidar
Sadaqat Ke Paikar Hussain Ibne Haidar

Kiya Jis Ki Khatir Taweel Apna Sajda
Woh Sibte e Payambar Hussain Ibne Haidar

Lahu Se Kiya Jis Ne Islam Zinda
Ali Ka Woh Dilbar Hussain Ibne Haidar

Rahga Humein Yaad Har Dam Tumhari
Shahadat Ka Manzar Hussain Ibne Haidar

Ke Barson Se Tum Odh Kar So Rahe Ho
Tahammul Ki Chaadar Hussain Ibne Haidar

Jalaaya Hai Maine Bhi Shamme Muhabbat
Mere Dil Ke Andar Hussain Ibne Haidar

Kiya Aap ka Zikr Maine To Mera
Hua Dil Munawwar Hussain Ibne Haidar

Tumhare Hi Dam Se Fiza Lag Rahi Hai
Mu'attar Mu'attar Hussain Ibne Haidar

Mujhe Bhi Ata Kar Do Nisbat Tumhari
Banaa Lo Sag e Dar Hussain Ibne Haidar

Tumhare Hi Sadqe Mein Mehshar Mein Hum Ko
Mile Jaam e Kausar Hussain Ibne Haidar

Tumhari Hi Kashti Panaah Gaahe Shakir
Tumhi Mere Yaawar Hussain Ibne Haidar.

FATIMA ZAHRA KI CHAADAR KA HAI SAAYA MOHTARAM

Al Haj Sayed Mohammad Qadri Sahab (Muballighe Sunni Dawate Islami)

Fatima Zahra Ki Chaadar Ka Hai Saaya Mohtaram
Unke Waalid Ko Unhein Rab Ne Banaya Mohtaram

Hazrat e Maula Ali Hasnain Zahra Mustafa
Chaadar-e-Tat'heer Mein Jo Bhi Samaaya Mohtaram

Mohtaram Saadaat Ka Ye Silsila Yoon Hi Bana
Fatima Zahra Ka Hai Har Ek Jaaya Mohtaram

Har Sheher Mein Raaj Wallah Tere Shehzaadon Ka Hai
Khuld Ka Hasnain Ko Sayyed Banaya Mohtaram

Muqtada Isa Nazar Aate Hain Yaan khud Muqtadi
Khoob Mehdi Haq Imam Ka Nibhaya Mohtaram

Hai Khuda e Lam Yazal Ka Be Masal Shaahkaar Ye
Maryam o Hawwa Ne Bhi Faizan Paaya Mohtaram

Mehr-o-Maah Ki Aankhein Tarsee(n) Jiske Aanchal Ke Liye
Apne Baba Se Hayaa Ka Dars Paaya Mohtaram

Kham Hui Gardan Nigaahein Jhuk Gayi Mehshar Mein Sab
Binte Khatm-ul-Mursaleen Sa Kaun Aaya Mohtaram

Ya Abaz-Zahra Teri Beti Pe Ho Ghar Bhar Nisaar
Binte Hawwa Ko Qareena Hai Sikhaya Mohtaram

Faatima Ka Laadla Woh Shaykh e Jeelani Mera
Khwaja-e-Ajmer Ko Rutba Dilaya Mohtaram

Noor Binte Noor Zauja e Noor Umme Noor o Noor
Koi Bhi is Taur Se Hum Ne Na Paaya Mohtaram

Nisbat-e-Zahra Mile Sayyed Ko Aalam Bol Uthe
Khoob Qadmon Mein Sulaaya Aur Banaya Mohtaram

AHLE BAIT E PAAK PAR YE JAAN BHI QURBAN HAI

Al Haj Sayed Mohammad Qadri Sahab (Muballighe Sunni Dawate Islami)

Ahle Bait e Paak Par Ye Jaan Bhi Qurbaan Hai
Unki Ulfat Hi Mere Imaan Ki Pehchaan Hai

Naujawaan e Ahle Jannat Ka Wahi Sultaan Hai
Karbala Mein Aaj Dekho Be Sar o Samaan Hai

Ye Hai Apne Rab Se Raazi Inse Khush Rehmaan Hai
Mat Kaho Murda Inhe Qur'an Ka Ailaan Hai

Mustafa o Murtaza o Fatima Hasan o Hussain
Panjatan Ke Dar Ka To Jibreel Bhi Darbaan Hai

Sabr Jo Tumne Kiya Hai Aur Koi Kya Kare
Sabr e Ahle Bait Par Khud Sabr Bhi Hairaan Hai

Hai Ali Akbar Bhi Qurban Aur Ali Asgar Nisaar
Qasim o Abbas Bhi Tere Liye Qurbaan Hai

Jo Chaman Phoola Phala Tha Shaad Tha Aabaad Tha
Naagaha Ye Kya Hua Saara Chaman Veeraan Hai

Aakhri Deedar Kar Lo Fatima Ke Laal Ka
Jaa Rahe Hai Soo e Jannat Kya Anokhi Shaan Hai

Sar Ko Sajde Mein Kata Kar Deen Ko Zinda Kiya
Ummat e Aasi Pe Maula Aap Ka Ehsaan Hai

Shehre Yaare Karbala Aye Mazhare Shere Khuda
Main Fida Ho Jaau Tum Par Ye Mera Armaan Hai

Kaash Hum Hote Waha Aur Aap Pe Jaan Waarte
Jo Na Tum Par Ho Fida Wo Jaan Hi Kya Jaan Hai

Hai Nujum e Rehnuma Saare Sahaba Ahle Bait
Naau Hai Ahle Sunan Ki Manzilen Aasaan Hai

Tu Nawasa Kis Ka Hai Nisbat Hussaini Hai Teri
Sayyed e Khasta Teri Nusrat Ko Nana Jaan hai

HUSSAIN NAAM HAI ALLAH KI INAAYAT KA

Al Haj Sayed Mohammad Qadri Sahab (Muballighe Sunni Dawate Islami)

Hussain Naam Hai Allah Ki Inaayat Ka
Hussain Naam Hai Sarkaar Ki Himaayat Ka

Hussain Naam Hai Maula Ki Mazhariyat Ka
Hussain Naam Hai Anwaar e Hashimiyat Ka

Hussain Naam Hai Ek Sham'a e Hidaayat Ka
Hussain Naam Hai Nana Ki Us Wasiyat Ka

Hussain Naam Hai Zabeeh Ki Riwaayat Ka
Hussain Naam Hai Qur'an Ki Hikaayat Ka

Hussain Naam Hai Ma'ayaar e Ashrafiyat Ka
Hussain Naam Hai Itmaam e Kaamiliyat Ka

Hussain Naam Hai Eeqaan e Aagahiyat Ka
Hussain Naam Hai Imaan Aur Hidaayat Ka

Hussain Naam Hai Aaq a e Qaadriyat Ka
Hussain Naam Hai Sar Chashma e Wilaayat ka

Hussain Naam Hai Me'raaj e Aadmiyat ka
Hussain Naam Hai Wallah Haq ki Rooi'at Ka

Hussain Naam Hai Wahdat Mein Aksariyat Ka
Hussain Naam Hai Ummat Ki Markaziyat Ka

Hussain Naam Hai La Muntahi Hikaayat Ka
Hussain Naam Hai Sayyed Teri Riwaayat Ka

ISLAM NE HAI PAAYI FAZEELAT HUSSAIN SE

Al Haj Sayed Mohammad Qadri Sahab (Muballighe Sunni Dawate Islami)

Islaam Ne Hai Paayi Fazeelat Hussain Se
Milti Hai Do Jahaan Ko Ne'mat Hussain Se

Qur'an Kitaab Hai To Uswa Hai Ahle Bait
Jaari Rahegi Hashr Tak Sunnat Hussain Se

Mujh se Hai Ye Hussain Wa Anaa Minal Hussain
Farmaate Hain Ye Maahe Risaalat Hussain Se

Islaam Ki Ragon Mein Yahí Khoon Hai Rawaan
Mumkin Nahin Qabool Ho Rukhsat Hussain Se

Hai Majma'a Behrain Teri Zaat Ya Hussain
Ki Rab Ne Bhi Pasand Azeemat Hussain Se

Sayyed Fidaa e Panjatan o Chaar Yaar Hai
Ta'azeem Us Ne Sikhee Hai Hazrat Hussain Se



BAYAAN HO KIS TARAH PYAARE FAZEELAT SHAH E KARBAL KI

Al Haj Sayed Mohammad Qadri Sahab (Muballighe Sunni Dawate Islami)

Bayaan Ho Kis Tarah Pyaare Fazeelat Shah e Karbal Ki
Koi Kya Jaan Paaye Shaan o Azmat Shah e Karbal Ki

Qasam Allah Ki Hargiz Na Jaaye Naar e Dozakh Mein
Ke Jis Ke Qalb Mein Bas Jaaye Ulfat Shah e Karbal Ki

Kaleja Muh Ko Aata Hai Ke Jab Koi Sunaata Hai
Shahaadat Shah e Karbal ki Shahaadat Shah e Karbal ki

Yazeedi Mit Gaye Khud Jo Chale Un ko Mitaane Ko
Khuda Ne Khud Badhaayi Izzat o Shaukat Shah e Karbal ki

Nabi Paak ne Farmaa Diya Sardaar e Jannat Hai
Siyaadat Shah e Karbal Ki Hai Jannat Shah e Karbal Ki

Madina Jaaye Ye Sayyed Wahaan Se Karbala Aaye
Khuda Kar De Ataa Us Ko Ziyaarat Shah e Karbal ki



WOH KAUN JIS KA KE ASL AL USOOL ZINDA HAI

Al Haj Sayed Mohammad Qadri Sahab (Muballighe Sunni Dawate Islami)

Woh Kaun Jiska Ke Asl-al-Usool Zinda Hai
Hamein Woh Log Hain Jin Ka Rasool Zinda Hai

Jo Unke Ishq Mein Marta Hai Kab Woh Murda Hai
Shahadat Uski Hui Hai Qabool Zinda Hai

Ke Ahle Bait e Nubuwwat Ki Bhi Misaal Nahin
Har Ek Aashiq-e-Zahra Batool Zinda Hai

Bachaane Aaye The Islam Karbala Mein Jo
Nabi Ke Baag Ka Har Ek Phool Zinda Hai

Hussain Ke Liye Maatam Wa Seena Kobi Kyun?
Shaheed Ke Liye Kyun Ho Malool Zinda Hai

Namaz e Aqsa Mein Jo Muqtadi Hue Haazir
Woh Un Sabhi Ka Muqtada Rasool Zinda Hai

Fanaa Se Paak Hai Qur'an To Ye Maan Bhi Lo
Ke Jin Pe Iska Hua Hai Nuzool Zinda Hai

Shukook Woh Bhi Hayaat-un-Nabi Mein Kyun Ho Jab
Ke Jibraeel Ke Qadmon Ki Dhool Zinda Hai

Hua Nisaar Jab Aale Batool Par Sayyed
Bahisht Mein Hua Iska Dukhool Zinda Hai



YAZEED MAR GAYA MERA HUSSAIN ZINDA HAI

Al Haj Sayed Mohammad Qadri Sahab (Muballighe Sunni Dawate Islami)

Yazeed Mar Gaya Mera Hussain Zinda Hai
Woh Haq Paraston Ka Moula Hussain Zinda Hai

Sabhi Shaheedon Ka Aaqaa Hussain Zinda Hai
Bahisht Walon Ka Dulha Hussain Zinda Hai

Yazeed Mit Gaya Barbaad Ho Gaya Beshak
Magar Woh Sayyed e Wala Hussain Zinda Hai

Yazeediyon Ka Muqaddar Bhi Ho Gaya Murda
Hussainiyon Raho Zinda Hussain Zinda Hai

Behek Sakega Na Gumraah Woh Hoga Hargiz
Agar Raha Ye Aqeedah Hussain Zinda Hai

Woh Khud Hi Murda Hai Jo Murda Keh Raha Hai Unhein
Qur'an Ka Hai Ishara Hussain Zinda Hai

Farishte Aate Hain Karbal Mein Ab Bhi Behre Salaam
Lahad Mein Aaj Bhi Mera Hussain Zinda Hai

Shaheed Marta Kahan Hai Suno Jahaan Walon
Shaheed Zinda Hai Zinda Hussain Zinda Hai

Zamaane Beet Gaye Ab Bhi Zakhm Taaza Hai
Ye Khoon Behtaa Hai Kis Ka Hussain Zinda Hai

Hussainiyon Tumhein Rakhna Hai Laaj Karbal Ki
Hamesha Yaad Ye Rakhna Hussain Zinda Hai

Ghira Hai Chaar Taraf Se Imam Ka Rauza
Khudaya Sab Ko De Dikhla Hussain Zinda Hai

Namaz e Ishq Mukammal Nahin Durood Bagair
Meri Salaat Mein Mera Hussain Zinda

Jo Zulm Aal e Payambar Pe Ho Qiyaamat Tak
Unhein khabar Hai Ye Wallah Husain Zinda Hai

Hayaat Baqi HoJab Tak Yahı Ho Rat Apni
Ye Marte Marte Bhi Kehna Husain Zinda Hai

Baqa Hai Inke Liye Jo Shaheed Hain Sayyed
Fanaa Ho Chaahe Zamana Hussain Zinda Hai

Sitam Raseeda Hai Sayyed To Kya Tujhe Parwaah
Ali o Fatima Moula Hussain Zinda Hai !



AHLE BAIT E PAAK KI ULFAT MERA IMAAN HAI

Al Haj Rashid Razvi Sahab (Muballighe Sunni Dawate Islami)

Ahle Bait e Paak Ki Ulfat Mera Imaan Hai
Karbala Walo Se Qaayam Deen Ki Pehchaan Hai

Aaj Kya Paigaam Karbal Se Koi Laayi Saba
Dil Ki Basti Mein Bapa Phir Aaj Ik Haijaan Hai

Jis Ko Mewe Khuld Ke Nana Khilate The Kabhi
Bhooka Pyaasa Karbala Mein Aaj Woh Mehman Hai

Zalimon Sar To Liya Lekin Magar Jeete Nahi
Aaj Bhi Ghamkhwar Ummat Ka Wahi Sultan Hai

Bhool Baitha Raahe Haq Woh Naar Ki Janib Chala
Ahle Bait e Paak Ki Ulfat Se Jo Anjaan Hai.

Phir Yazeedi Aa Gaye Hain Najdiyon Ke Bhes Mein
Zurriyat Ke Saath Apni Aa Gaya Shaitan Hai

Laaj Rakh Li Aap Ne Islam Ki Ibne Ali
Sab Ka Sab Nana Ke Deen Par Kar Diya Qurbaan Hai

Aap Ke Darbar Ka Adna Gada Kehlaoon Main
Rashid e Razvi Ka Aaq Bas Yahi Armaan Hai.

SAR ZAMEEN E KARBALA HAI ZULM KA BAZAAR HAI

Al Haj Rashid Razvi Sahab (Muballighe Sunni Dawate Islami)

Sar Zameen e Karbala Hai Zulm Ka Bazaar Hai
Aur Ek Mazloom Ibn e Haider e Karrar Hai

Ahle Bait e Shahe Deen Par Gham Ke Baadal Chaaye Hain
Bosa Gaahe Mustafa Par Teeron Ki Bochaar Hai

Akbar o Qasim Khirama Soo e Jannat Chal Diye
Asgar e Be Sheer Jaane Ke Liye Tayyar Hai

Hazrat Aun o Muhammad Tohfa e Jaan Laye Hain
Kehte Hain Dada Hamara Jaafar e Tayyar Hai

Pesh Kar Ke Apne Noor e Ain Zainab Ne kaha
Mere Bhai Ye Behen Ka Adna Sa Eesaar Hai

Pyaas Ki Khatir Nahi Shauq e Shahadat Ke Liye
Hai Tadap Asghar Ki Dekho Kis Qadar Hoshiyar Hai

Zinda Hain Saare Shahidaan e Muhabbat Zinda Hain
Murda Unko Jo Kahe Woh Naar Ka Haqdaar Hai

Jab Chale Maqatal Ko Sayyed Shor Khaimon Mein Utha
Fatima Ke Laal Ka Ye Aakhri Deedaar Hai

Sar Se Chaadar Chhin Gayi Lekin Nazar Utthi Nahi
Hazrat e Zainab Tumhare Kya Haseen Kirdaar Hai

Laaj Rakh Lena Sare Mehshar Meri Ibne Nabi
Rashid e Razvi Tumhara Banda e Nadaar Hai.

YEH BAAT KIS QADAR HASEEN JO KEH GAYE MOINUDDIN

Yeh Baat Kis Qadar Haseen Jo Keh Gaye Moinuddin
Ke Deen Ki Panah Hussain Hai Mera Hussain Hai
Mera Badshah Hussain Hai

Aman Ka Mehromaah Bhi
Jo Shaahon Ka Hai Shaah Bhi
Aisa Badshah Hussain Hai, Mera Hussain Hai
Mera Badshah Hussain Hai

Kare Koi Jo Hamsari Kisi Ki Kya Majaal Hai
Hussain Har Lihaaz Se Jahaan Mein Be Misaal Hai
Ye Ho Chuka Hai Faisla Na Koi Dusra Hasan
Na Koi Dusra Hussain Hai Mera Hussain Hai
Mera Badshah Hussain Hai

Hidayate Hussain Par Amal Karo Aye Mominon
Rahenge Hum Bahisht Mein Yaqeen Rakho Aye
Mominon
Kubool Hogi Har Dua Kisi Se Kyun Darein Bhala
Humara Waasta Hussain Hai Mera Hussain Hai
Mera Badshah Hussain Hai

Duaon Mein Nidaon Mein Joh Waasta Ise Banaega
Bahisht Ki Jo Rahon Ka Rasta Ise Banaega
Na Waaste Mein Tod Hai Na Raaste Mein Mod Hai
Aisi Seedhi Raah Hussain Hai Mera Hussain Hai
Mera Badshah Hussain Hai

Kaza Ke Baad Fir Mujhe Nayi Hayaat Mil Gayi
Azaab Se Itaab Se Mujhe Nijaat Mil Gayi
Sawaal Jab Kiya Gaya Hai Kaun Tera Peshwaa
To Maine Keh Diya Hussain Hai Mera Hussain Hai
Mera Badshah Hussain Hai

Shaheed e Karbala Ka Gham Jise Bhi Na Gawaar Hai
Wo Bad Amal Hai Bad Nasab Usi Pe Be Shumar Hai
Are Oh Dushman-e Azal Tu Mar Zara Qabar Mein Chal
Pata Chalega Kya Hussain Hai Mera Hussain Hai
Mera Badshah Hussain Hai

Karega Jo Mukhalifat Gham e Hussain Ki Yahan
Woh Hoga Hashr Hashr Mein Ke Al Hafeez o Al Amaan
Jaha Bhi Chupne Jayega Kahin Bhi Bach Na Payega
Ke Har Jagah Mera Hussain Hai Mera Hussain Hai
Mera Badshah Hussain Hai



MEERA MAULA MAULA HUSSAIN HAI

Hazrat Allama Nisar Ali Ujagar Sahab

Jo Hua Nawasa e Mustafa
Wo Ali Ka Beta Hussain Hai
Jo Yazeediyat Ko Fanah Kare
Shahe Karbala Wo Hussain Hai
Bibi Fatima Ka Wo Laadla
Mera Badshah Wo Hussain Hai
Mera Maula Maula Hussain Hai

Kya Sunaau Waakiya Karbala
Haaye Teer Neza Kaha Laga
Jise Choomte Rahe Mustafa
Wo Hussaini Sar Tha Kataa Hua
Saara Ghar Ka Ghar Bhi Luta Diya
Wo Jo Kar Gaya Wo Hussain Hai
Mera Maula Maula Hussain Hai

Yahi Bole Hazrate Hur Shaha
Ya Hussain Aap Ka Shukriya
Ke Yazeediyon Se Nikal Kar
Jo Hussainiyon Mein Bitha Diya
Mujhe Manzilon Ka Pata Diya
Mera Rehnuma Wo Hussain Hai
Mera Maula Maula Hussain Hai

Wo Bhi Banda Kitna Ajeeb Hai
Jo Kahe Yazeed Bhi Theek Hai
Ya Hussaini Ban Ya Yazeedi Ban
Aise Jhoot Mein Kyun Shareek Hai
Kyun Do Kashtiyon Ka Sawaar Hai
Jo Hai Haq Numa Wo Hussain Hai
Mera Maula Maula Hussain Hai

Jo Dar e Hussain Pe Aagaya
Saari Mannaton Ko Wo Paa Gaya
Ye Gharana Aale Nabi Ka Hai
Jo Sakhawatun Ko Sikha Gaya
Jo Faqeer Ko Kare Badshah
Aisa Badshah Wo Hussain Hai
Mera Maula Maula Hussain Hai

Ye Wazeefa Hai Meri Naukri
Main Padhunga Naade Ali Ali
Main Piyunga Jaame Qalandari
Main Lagaunga Naara e Haidari
Do Ujaagar Ishq Mein Ye Sada
Mujhe Mil Gaya Wo Hussain Hai
Mera Maula Maula Hussain hai



MEERA HUSSAIN BAGH E NABUWAT KA PHOOL HAI

Mera Hussain Bagh e Nabuwat ka Phool hai
Haidar Ki Isme Jaan Hai Khoon e Batool Hai

Guzra Jaha Jaha Se Nawasa Rasool Ka
Ab Tak Waha Khuda Ke Karam Ka Nuzool Hai

Aisi Azeem Zaat Hai Maula Hussain Ki
Jis Ke Liye Huzoor Ke Sajdo Mein Tool Hai

Jis Ke Liye Yazeed Ne Itne Sitam Kiye
Woh Taaj To Hussain Ke Qadmon Ki Dhool Hai

Duniya Mein Aur Kaun Hai Shabbir Ke Siwa
Aisa Sawaar Jis Ki Sawaari Rasool Hai



SAR BULANDI KI RIWAAYAT SAR KATAANE SE CHALI

Sar Bulandi Ki Riwaayat Sar Kataane Se Chali
Nabze Imaan Teri Nabze Doob Jaane Se Chale

Nazre Di Jaan Hi Nahi Sab Lakhte Jaan Bhi Kar Diye
Reet Ye Tujh Se Chali Tere Gharane Se Chali

Tu Ne Maani Hi Badal Daale Shikast o Fatha Ke
Rasme Hasti Apni Hasti Ko Mitane Se Chali

Ghar Se Tujh Ko Karbala Ki Samt Jaata Dekh Kar
Abr Utha Sehra Se Bijli Aashiyane Se Chali

Aane Waala Lamha Lamha Teri Bai-at Kar Chuka
Baat Teri Az Sare Nau Har Zamaane Se Chali

Main Muhammad Ka Ghulam Aale Muhammad Ka Ghulaam
Apni Har Tasweer Isi Aayina Khane Se Chali.



SHERE KHUDA KA SHER HAI MERE HUSSAIN HAI

Sher e Khuda Ka Sher Hai Mera Hussain Hai
Sab Se Bada Diler Hai Mera Hussain Hai

Karbal Mein The Hazaaron Yazeedi Khade Huwe
Teero Kamaan Haathon Me Neze Liye Huwe
Tanha Kiya Jis Ne Sabhi Ka Muqabla
Woh Mustafa Ka Sher Hai Mera Hussain Hai

Baba Hai Jis Ka Murtaza Khairunnisa Hai Maa
Naani Khadeeja Nana Hai Sarkaar e Do Jahaan
Is Ghar Ki Shaan Lafzon Mein Kaise Karu Bayaan
Jis Ka Gharana Khair Hai Mera Hussain Hai

Duniya o Aakhirat Mein Rahega Na Chain Se
Rakhta Hai Jo Bhi Seene Mein Keena Hussain Se
Gustakhe Ahle Bait Se Rishta Nahi Qubool
Apna Nahi Woh Gair Hai Mera Hussain Hai

Takreer Sun Ke Hazrate Hur Ne Imaam Ki
Ibne Ali Ke Saath Mein Hone Ki Thaan Li
Kehne Lage The Aake Woh Jaishe Hussain Se
Ab Har Yazeedi Gair Hai Mera Hussain Hai

Deene Khuda Se Kar Diya Fitnon Ka Sadde Baab
Apne Lahoo Se De Diya Islaam Ko Shafaat
Kitna Buland Kar Diya Islaam Ka Alam
Jis Ka Ye Kaare Khair Hai Mera Hussain Hai

Farmayi Hai Khuda Ne Ye Taufeeq Marhamat
Shabbir Ki Wila Mein Ye Likhi Hai Manqabat
Irfan Tu Bhi Shaamile Maddah Ho Gaya
Unke Karam Ka Pher Hai Mera Hussain Hai



ZAHRA KE PYAARE LAAL SE HAIDAR KE CHAIN SE

Zahra Ke Pyaare Laal Se Haidar Ke Chain Se
Jo Bhi Mila Hai Hum Ko Mila Hai Hussain Se

Bin Chahate Hussain Kya Jeene Ka Faida
Bachpan Se Mujh Ko Maa Ne Sikhaya Hai Qaaida
Tarze Hayaat Seekho Shahe Mashriqain Se
Jo Bhi Mila Hai Hum ko Mila Hai Hussain Se

Sar Ba Sujood Ho Gaye Karbal Mein Jab Imaam
Waqt e Qaza Hain Khaliq e Akbar Se Hum Kalaam
Zinda Namaaz Hai To Ibaadat Ke Zain Se
Jo Bhi Mila Hai Hum ko Mila Hai Hussain se

Shere Khuda Ke Chain Ne Raahib Se Poochiye
Kya Kuch Diya Hussain Ne Raahib Se Poochiye
Milte Hain Saath Bachche Shahe Mashriqain Se
Jo Bhi Mila Hai Hum ko Mila Hai Hussain se

Ye Izzato Maqaam Ye Andaz Ba Kamaal
Kis Se Mila Hussain Ko Ye Husne Be Misaal
Noor e Khuda Se Faatahe Badar o Hunain Se
Jo Bhi Mila Hai Hum ko Mila Hai Hussain se

Ishq e Hussain e Paak Ka Hum Ko Sila Mila
Maanga Jo Maangna Tha Talab Se Siwa Mila
Sultaan e Ambiya Ke Isi Noor e Ain Se
Jo Bhi Mila Hai Hum ko Mila Hai Hussain se

Aisa Hussainiyon Ka Jahaan Mein Jalaal Hai
Kaatib Yazeede Waqt Ka Jeena Muhaal Hai
Duniya Jo Goonjti Hai Sadaa e Hussain Se
Jo Bhi Mila Hai Hum ko Mila Hai Hussain se

ZAMEEN O AASMAAN MEIN HUSSAIN SA KOI NAHI

Zameen o Aasmaan Mein Mein Hussain Sa Koi Nahi
Khuda Ke Is Jahaan Mein Hussain Sa Koi Nahi

Raza e Haq Pe Karbala Mein Apna Sab Luta Diya
Wafa Ke Imtihaan Mein Hussain Sa Koi Nahi

Likha Hua Hai Lauhe Dil Pe Naam Bas Hussain Ka
To Dil Ke Is Makaan Mein Hussain Sa Koi Nahi

Likhega Kaun Is Tarah Shahadatun Ki Daastan
Kisi Ke Khandaan Mein Hussain Sa Koi Nahi

Karega Kaun Saamna Yazeed e Waqt Ka Yaha
Humare Darmiyaan Mein Hussain Sa Koi Nahi



HUSSAIN JAISA SHAHEED E AAZAM JAHAAAN MEIN KOI HUA NAHI HAI

Hussain Jaisa Shaheed e Aazam Jahaan Mein Koi Hua Nahi Hai
Churi Ke Neeche Gala Hai Lekin Kisi Se Koi Gila Nahi Hai

Adoo The Jab Sar Pe Taig Tole Hussain Sajde Mein Jaake Bole
Madine Walon Gawaah Rehna Namaaz Meri Qaza Nahi

Pukaare Abbas Aye Sakina
Main Paani Laaunga Aye Sakina
Kate Hai Baazu Chida Hai Seena
Abhi Mera Sar Kata Nahi Hai

Gareeb Ummat Ki Bekaasi Par Hussain Ka Sar Kata Hai Lekin
Yazeed Jaise Shaqi Aage Hussain Ka Sar Jhuka Nahi Hai



KYA DEEN E MUSTAFA KO JAGAAYA HUSSAIN NE

Kya Deen e Mustafa Ko Jagaaya Hussain Ne
Karbala Mein Saara Kumbaa Lutaaya Hussain Ne

Aisa Namaaze Ishq Ka Sajda Adaa Kiya
Sar Ko Jhuka Ke Arsh Hilaaya Hussain Ne

Dars e Tauheed De Ke Ghulaamon Ko Aap Ne
Kufr o Shirk Ki Gar Mitaaya Hussain Ne

Sajde Mein Sar Kataaya Hai Padh Kar Namaaz e Ishq
Neze Pe Chadh Qur'an Sunaaya Hussain Ne



KYA HUSNE IFTIKHAR HAI YAADE HUSSAIN MEIN

Kya Husne Iftikhar Hai Yaade Hussain Mein
Har Ashq Ek Bahaar Hai Yaade Hussain Mein

Darbaar e Mustafa Ki Fazeelat Na Poochiye
Insaan Ka Waqaar Hai Yaade Hussain Mein

Har Ashq Kalma Padhte Hain Bar Deen e Mustafa
Kya Husne Yaadgaar Hai Yaade Hussain Mein

Wallah Sar Ba Sar Hai Wo Imaan Ka Sukoon
Jo Qalbe Beqaraar Hai Yaade Hussain Mein

Dil Zindagi Mein Kaise Na Ho Khuld Aashiyaan
Islam Ki Bahaar Hai Yaade Hussain Mein



REHMATE KIBRIYA HUSSAIN JALWAYE MUSTAFA HUSSAIN

Rehmate Kibriya Hussain Jalwaye Mustafa Hussain
Daulate Fatima Hussain Sarwate Murtaza Hussain

Baaghe Bahisht Ki Bahaar Kulhaaye Khuld Ki Nikhaar
Gaazaye Roo e Kaainaat Husne Khudanuma Hussain

Apni Zabaan Huzoor Ne Unko Chusaayi Baar Baar
Pee Ke Luaabe Mustafa Ban Gaye Kya Se Kya Hussain

Sirre Razaaye Kibriya Karbobala Mein Jab Khula
Ban Gaye Sar Se Ta Ba Paa Ganjinaye Wafa Hussain

Unki Wilaayate Tamaam Farsh Se Ta Ba Arsh Hai
Sayyade Auliya Hussain Murshide Asfiya Hussain

Aisi Bulandiya Mili Qadmon Mein Rif'ate Jhuki
Karbobala Ki Khaak Par Sajde Mein Jab Jhuka Hussain

Hubbe Hussain Hai Riyaaz Hubbe Rasool Kainaat
Shukre Khudaye Do Jahaan Hai Mera Mudda'a Hussain

HUM KYA KAHE KE KYUN HUME PYARA HUSSAIN HAI

Hum Kya Kahe Ke Kyun Hume Pyara Hussain Hai
Socho To Ye Jahaan Bhi Saara Hussain Hai

Hurmal Tu Sochta Hai Ke Asgar Masoom Hai
Kaise Darega Maut Se Saara Hussain Hai

Paakeezgi To Dekhiye Sehne Batool Mein
Qur'an Ki Tarah Hi Utaara Hussain Hai

Neze Pe Sar Buland Hai Ailaan Jeet Ka
Ab Kaun Keh Sakega Ke Haara Hussain Hai

Saare Shariyaton Ke Paaband The Magar
Pushte Nabi Se Kisne Utaara Hussain Hai



KHUDA SHANASI O KHUD AAGAH HUSSAIN SE HAI

Khuda Shanasi o Khud Aagahi Hussain Se Hai
Ke Aadmi Ba Khuda Aadmi Hussain Se Hai

Jalaa Gaya Hai Bahattar Charagh e Ilm o Amal
Jahaan Mein Chaar Taraf Raushni Hussain Se Hai

Khuda Ka Deen Khuda Ka Nabi Khuda Ki Kitaab
Ye Sab Milenge Agar Dosti Hussain Se Hai

Koi Zamaana Ho Maazi o Haal o Mustaqbil
Yazeediyat Ki Mukammal Nafee Hussain Se Hai

Jahaan Se Farqe Halaal o Haraam Uth Jaata
Ye Waaqfiyate Amr o Nahi Hussain Se Hai



QARAAR E JAAN O DIL E MUSTAFA HUSSAIN SE HAI

Qaraar e Jaan o Dil e Mustafa Hussain Se Hai
Shikasta Dil Ko Bada Hausla Hussain Se Hai

Liye Hai Chadar e Tatheer Se Unhe Zahra
Bahaar e Gulshan e Khairul Wara Hussain Se Hai

Ali Ke Laal Se Mat Kar Sawaal Bai-at Ka
Yazeed Hosh Mein Aa Saamna Hussain Se Hai

Lahoo se Apna Jalaaya Roze Aashoora
Nabi Ke Deen Ka Raushan Diya Hussain Se Hai

Naseeb Usko Kahaan Qurbat e Rasool e Zaman
Kisi Ke Dil Mein Agar Faasla Hussain Se Hai

Kata Ke Sajde Mein Sar Marziye Khuda Mein Di
Waqaar e Sajdaye Rabbul Ula Hussain Se Hai

Raza Jo Chaaho Duaye Ho Aaj Sab Ki Qubool
To Istijaabat e Harf e Dua Hussain Se Hai

YE DIL BHI HUSSANI HAI YE JAAN BHI HUSSAINI HAI

Ye Dil Bhi Hussani Hai Ye Jaan Bhi Hussaini Hai
Sad Shukr Ke Apna To Imaan Bhi Hussaini Hai

Tu Maane Ya Na Maane Apna To Aqeeda Hai
Har Qari Ke Honton Par Qur'an bhi Hussaini hai

Raunaq Hai Masaajid Mein Shabbir Ke Sadqe Mein
Mimbar Bhi Hussaini Hai Azaan Bhi Hussaini Hai

Jibreel Jo Laata Hasnain Ke Jhoole Ko
Lagta Hai Ke Aaq Ka Darbaan Bhi Hussaini Hai

Girne Nahi Deta Hai Kaandhon Se Nawaason ko
Kya Khoob ke Nabiyon ka Sultaan Hussaini Hai

Tum Samjho Ya Na Samjho Aye Ahle Jahaan Walon
Hai Lab Pe Jo Haakim Ke Ye Bayaan Hussain Hai



ZAMEEN FALAK MAAH O AKHTAR HUSSAIN WALE HAI

Zameen Falak Maah o Akhtar Hussain Wale Hai
Ye Kainaat Ke Manzar Hussain Wale Hai

Hawa Se Keh Do Wo Aajaaye Andhiyaan Lekar
Mere Chiraag Ke Tewar Hussain Wale Hai

Kata To Sakte Hai Lekin Jhuka Nahi Sakte
Hamare Jism Pe Ye Sar Hussain Wale Hai

Tum Apni Kasrate Taadat Pe Na Itraao
Suno Hamare Bahattar Hussain Wale Hai

Hussainiyon Ko Pilaayenge Jaam Kausar Ka
Huzoor Saahibe Kausar Hussain Wale Hai

Raza o Hamid o Noori Mufassir e Aazam
Hamare Hazrat e Akhtar Hussain Wale Hai



HADEESE ISHQ KA JALWA HUSSAIN SE LELO

Hadees e Ishq Ka Jalwa Hussain Se Lelo
Rasool e Paak Ka Sadqa Hussain Se Lelo

Umar Ye Bole Ke Mehshar Mein Kaam Aayega
Ghulaam Hone Ka Parcha Hussain Se Lelo

Gaya Jo Maangne Ajmer Mein Koi Jannat
To Usse Bole Ye Khwaja Hussain Se Lelo

Farishte Bolenge Mehshar Mein Har Hussaini Se
Ke Jaao Khuld Ka Pyala Hussain Se Lelo

Hai Passport Agar Ishq e Mustafayi Ka
To Us Pe Khuld Ka Visa Hussain Se Lo



JAAN MAANGO MAIN DIL NAHI DUNGA

Jaan Maango Main Dil Nahi Dunga
Ke Dil Thikana Mere Hussain Ka Hai

Dil Thikana Mere Hussain Ka Hai
Har Zamaana Mere Hussain ka Hai

Jis Ke Saaye Mein Kainaat Hai Sab
Aisa Nana Mere Hussain Ka Hai

Ye Jo Kaaba Hai Tum Na Samjhoge
Ghar Purana Mere Hussain Ka

Jis Jagah Hur Banaye Jaate Hai
Kaarkhana Mere Hussain Ka Hai

Maare Ik Sabr Se Hazaar Adoo
Kya Nishana Mere Hussain Ka Hai

Baab e Khaibar Jisne Ukhaad Diya
Aisa Baaba Mere Hussain ka Hai

Koi Pooche Ke Ye Daur kis Ka Hai
To Bataana Mere Hussain Ka Hai

Mere Ghar Mein Charagh Jalte Hai
Aana Jaana Mere Hussain ka Hai

MAIN KHUSH NASEEB HOON MUJH PE KARAM HUSSAIN KA HAI

Main Khush Naseeb Hoon Mujh Pe Karam Hussain Ka Hai
Ata Kiya Hua Saara Bharam Hussain Hussain Ka Hai

Mai Mo'tabar Hoon Jahaan Mein Hussain Ke Sadqe
Qasam Ali Ki Mere Dam Mein Dam Hussain Ka Hai

Falak Ki Aankh Se Girte Hai Aaj Bhi Aansoo
Falak Ke Seene Mein Aaj Bhi Gham Hussain Ka Hai

Khuda Ne Di Hai Unhe Jannaton Ki Sardari
Khuda Bhi Dekh Asad Hum Qadam Hussain Ka Hai



KHANDA PESHANI SE HAR SADMA UTHATE HAIN HUSSAIN

Khanda Peshani Se Har Sadma Uthate Hain Hussain
Ishq Ke Aadab Duniya Ko Sikhate Hain Hussain

Jab Guzarti Hai Kisi Dushwar Manzil Se Hayaat
Dafatan Har Mubtila Ko Yaad Aate Hain Hussain

Mohsin e Insaniyat Hai Nau Nihaal e Mustafa
Zulm Ki Zulmat Ko Duniya Se Mitaate Hain Hussain

Khaak Mein Mil Jayega Ek Aan Main Tera Guroor
Aye Girohe Asqiyah Tashreef Laate Hain Hussain

Kyun Na Hogi Hum Gunahgaron Ki Bakshish Hashr Mein
Sar Hateli Par Liye Tashreef Late Hain Hussain

Mauj e Kausar Jis Pe Qurbaan Us Muqaddas Khoon Se
Daastan e Ishq Ko Rangee Banaate Hain Hussain.



LIBAAS HAI PHATA HUA GUBAAR MEIN ATA HUA

Libaas Hai Phata Hua Gubaar Mein Ata Hua
Tamaam Jisme Nazneen Chida Hua Kata Hua
Ye Kaun Zee Waqaar Hai
Balaa Ka Shahsawaar Hai
Ke Hai Hazaar Qaatilon Ke Saamne Data hua

Ye Bil Yaqeen Hussain Hai
Nabi Ka Noore Ain Hai
Hussain Hai Hussain Hai
Nabi Ka Noore Ain Hai

Ye Kaun Haq Parast Hai Maye Raza e Mast Hai
Ke Jis Ke Saamne Koi Buland Hai Na Past Hai
Udhar Hazaar Ghaat Hai Magar Ageeb Baat Hai
Ye Ek Se Hazaar Ka Bhi Hausla Shikast Hai

Ye Bil Yaqeen Hussain Hai
Nabi Ka Noore Ain Hai
Hussain Hai Hussain Hai
Nabi Ka Noore Ain Hai

Dilaawari Mein Fard Hai Bada Hi Khair Mard Hai
Ke Jis Ke Dabdabe Se Rang Dushmanon Ka Zard Hai
Habeeb e Mustafa Hai Ye Mujaahid e Khuda Hai Ye
Jabhi To Iske Saamne Ye Fauj Gard Bard Hai

Ye Bil Yaqeen Hussain Hai
Nabi Ka Noore Ain Hai
Hussain Hai Hussain Hai
Nabi Ka Noore Ain Hai

Udhar Sipaahe Shaam Hai Hazaar Intezaam Hai
Udhar Hai Dushmanan e Deen Idhar Faqat Imaam Hai
Magar Ajeeb Shaan Hai Gazab Ki Aan Baan Hai
Ke Jis Taraf Uthi Hai Teg Bas Khuda ka Naam Hai

Ye Bil Yaqeen Hussain Hai
Nabi Ka Noore Ain Hai
Hussain Hai Hussain Hai
Nabi Ka Noore Ain Hai



SAYYED NE KARBALA MEIN WAADE NIBHA DIYE HAI

Sayyed Ne Karbala Mein Waade Nibha Diye Hai
Deen e Muhammadi Ke Gulshan Khila Diye Hai

Bole Hussain Maula, Teri Raza Ki Khaatir
Ek Ek Kar Ke Maine Heere Loota Diye Hai

Deen e Nabi Pe Waari Akbar Ne Bhi Jawaani
Abbas Ne Bhi Apne Baazu Kataa Diye Hai.

Zainab Ke Baagh Mein Bhi Do Phool The Mehekte
Zainab Ne Wo Bhi Dono Raahe Khuda Diye Hai.

Bakhshish Hai Unki Laazim Sayyed Ke Gham Mein Hafiz
Do Chaar Aansoo Ro Kar Jis ne Baha Diye Hai.

Sayyed Ne Karbala Mein Waade Nibha Diye Hai
Deene Muhammadi Ke Gulshan Khila Diye Hai



KAISE KAROON BAYAAN HIKAAYAT HUSSAIN KI

Kaise Karu Bayaan Hikaayat Hussain Ki
Islam Ki Hai Rooh Shahadat Hussain Ki

Waqt e Akheer Sajde Mein Hai Sar Jhuka Hua
Hai Kitni Be Misaal Ibaadat Hussain Ki

Karte The Jisse Pyaar Bohot Aamina ke Laal
Kuch Is Qadar Haseen Thi Soorat Hussain Ki

Islam Jaan Maange To Dete Hai Jaan Bhi
Aye Momino Yahi Hai Naseehat Hussain Ki

Shimr o Yazeed Ka Koi Leta Nahi Hai Naam
Lekin Zamaane Bhar Mein Hai Shohrat Hussain ki

Jibreel Jin Ka Jhoola Jhulate The Aye Saba
Itni Buland o Baala Hai Azmat Hussain Ki



RAAHE KHUDA MEIN SHAUQ SE SAR KO KATA GAYE HUSSAIN

Raahe Khuda Mein Shauq Se Sar Ko Kata Gaye Hussain
Haq Ki Raza Ke Waaste Ghar Ko Luta Gaye Hussain

Neze Pe Chad Ke Sar Baland Kar Gaye Deene Mustafa
Koshishe Kamiyab Se Baat Bana Gaye Hussain

Haq Ka Alam Liye Uthe Chaa Gaye Kainaat Par
Deen Ke Dushmanon Ka Sar Neeche Jhuka Gaye Hussain

Aansoo Lahu Ke Aaj Bhi Roti Hai Karbala Ki Khaak
Zakhm Har Ik Ke Qalb Mein Kaisa Laga Gaye Hussain

Ibne Ali Ki Shaan Kya Tujh Se Bayaan Ho Aye Riyaaz
Jis Ki Nahi Misaal Woh Martaba Paa Gaye Hussain



ISLAM TUJHI SE ZINDA HAI

Islam Tujhi Se Zinda Hai
Aye Shaahe Shahadat Kya Kahiye
Tu Mohsin e Deen o Duniya Hai
Aye Shahe Shahadat Kya Kahiye

Islam Ko Zinda Kar Ke Rahe
Sar Kufr Ka Neecha Ho Ke Raha
Teeron Mein Namaaz Allah Allah
Nezon Pe Tilawat Kya Kahiye

Dozakh Se Nikal Kar Jannat Mein
Maut Aayi To Shah Ke Qadmon Mein
Naaza Hai Farishte Bhi Tum Par
Aye Hur Teri Qismat Kya Kahiye

Darbaare Yazeed Hai Khatm Hua
Sarkaar e Hussaini Zinda Hai
Islam Ke Aage Jhuk Hi Gayi
Baatil Ki Hukumat Kya Kahiye

TUMHARE SAJDE KO KAABA SALAM KEHTA HAI

Sayyidul Ulema Hazrat Sayyed Shah Aale Mustafa Marehravi Alairhir Rehma

Tumhare Sajde Ko Kaaba Salaam Kehta Hai
Jalaal e Qubba e Khazra Salaam Kehta Hai.
Chaman Ka Har Gul o Guncha Salaam Kehta Hai
Hussain Tum Ko Zamana Salaam Kehta Hai.

Charaag o Masjid o Mimbar Salaam Kehte Hain
Nabi Rasool Payambar Salaam Kehte Hain
Ali o Fatima Shabbar Salaam Kehte Hain
Khuda Gawaah! Ke Nana Salaam Kehta Hain.

Khuda Ki Raah Mein Sar Ko kata Diya Tum Ne
Nabi Ke Deen Pe Ghar Ko Luta Diya Tum Ne
Nishaan e Kufr Ko Yaksar Mita Diya Tum Ne
Tumhein Khuda Bhi Tumhara Salaam Kehta Hai.

Tumhein Falak Ke Sitaare Salaam Kehte Hain
Tumhein Qur'an Ke Paare Salaam Kehte Hain
Tumhein Haram Ke Minaare Salaam Kehte Hain
Imaam Tum Ko Madina Salaam Kehta hai.

Sana Tumhari Wazeefa Hai Mera Aabaai
Tumhari Madh To Shewah Hai Mera Maulaai
Bas Ek Nazar Ho Jo Mujh Par To Meri Ban Aayi
Tumhara Sayyade Shaida Salaam Kehta Hai.

MERE HUSSAIN TUJHE SALAAM

Mere Hussain Tujhe Salaam
Assalam Ya Hussain

Kar Liya Nosh Jis Ne Shahadat Ka Jaam
Us Hussain Ibne Haider Pe Lakhon Salaam
Mere Hussain Tujhe Salaam

Jin Ko Dhoke Se Koofe Bulaaya Gaya
Jin Ko Baithe Bithaye Sataaya Gaya
Jin Ke Bachcho Ko Pyaasa Rulaaya Gaya
Jin Ki Garden Pe Khanjar Chalaya Gaya
Us Hussain Ibne Haider Pe Lakhon Salaam

Jin Ka Jannat Se Joda Mangaya Gaya
Jin Ko Doshe Nabi Pe Bithaaya Gaya
Zeher Bhai Ko Jis Ke Pilaaya Gaya
Jis Ko Teero Se Chalni Karaaya Gaya
Us Hussain Ibne Haider Pe Lakhon Salaam

Jis Ne Haq Karbala Mein Ada Kar Diya
Apne Nana Ka Wada Wafa Kar Diya
Sab Kuch Ummat Ki Khatir Fida Kar Diya
Ghar Ka Ghar Hi Supurde Khuda Kar Diya
Us Hussain Ibne Haider Pe Lakhon Salaam

Kar Chuka Wo Abhi Apni Hujjat Tamam
Le Ke Allah Aur Apne Nana Ka Naam
Koofiyon Ko Sunaaye Khuda Ke Kalaam
Aur Fida Ho Gaya Wo Wahi Tishna Kaam
Us Hussain Ibne Haider Pe Lakhon Salaam

KARBALA KE JAAN NISAARON KO SALAAM

Karbala Ke Jaan Nisaaron Ko Salaam
Fatima Zahra Ke Pyaaron Ko Salaam

Jisne Apna Sar Kataaya Deen Par
Us Hussain e Ibne Haidar Ko Salaam

Kat Gaye Baazu Alam Bardaar Ke
Sabr Ke Us Jaame Paikar Ko Salaam

Nanhe Ki Sookhi Zabaan Pyaas Se
Us Ali Asgar Ki Azmat Ko Salaam

Kis Qadar Dulha Bane Ibne Hasan
Hazrate Qasim Ki Rif'at Ko Salaam

Khoon Mein Doobi Jawaani Laal Ki
Ham Shabihe Shaahe Madani Ko Salaam

Jisne Rakh Li Aabroo Islaam Ki
Chaadar e Zainab Ki Azmat Ko Salaam

Lut Gaya Sab Kuch Magar Parde Kiye
Un Sabhi Parda Nasheenon Ko Salaam

Karbala Mein Jo Huwe Jitne Shaheed
Un Sabhi Noorie Mazaaron Ko Salaam

Jinke Sadqe Razvi Bhi Noorie Hua
Paakeeza Noorie Jamaa'at Ko Salaam

LAALE KHATOON E JANNAT PE LAAKHON SALAAM

Laale Khatoon e Jannat Pe Laakhon Salaam
Sibt e Shaah e Risaalat Pe Laakhon Salaam

Jis Ko Kaandhe Pe Nana Bhithate Rahe
Jis Ko Firdausi Hulle Pehnaate Rahe
Jis Ka Gilmaan Jhoola Jhulate Rahe
Jis Ko Jannat Ke Mewe Khilaate Rahe
Us Ki Har Naaz o Nemat Pe Laakhon Salaam

Yaume Aashoora Maloom Hai Haadsa
Tap Rahi Thi Zamee Jal Raha Tha Samaa
Aur Zaalim Ke Zulmon Ki Thi Intihaa
Aise Toofaan Mein Bhi Jo Hasta Raha
Us Tabassum Ki Aadat Pe Laakhon Salaam

Jis Ko Dhoke Se Koofa Bulaaya Gaya
Jis Ko Mehmaan Bana Kar Sataaya Gaya
Jis Ko Khana Na Paani Pilaaya Gaya
Jis Ki Gardan Pe Khanjar Chalaya Gaya
Us Shaheede Shahadat Pe Laakhon Salaam

Jis Ne Nana Ka Wada Wafa Kar Diya
Sher e Nar Ko Bhi Pesh e Qaza Kar Diya
Khud Bhi Hairaan Shaqi The Ye Kya Kar Diya
Bhooke Pyaase Ne Mehshar Bapaa Kar Diya
Us Jaree Ki Shujaat Pe Laakhon Salaam

AALE AHMED KI AZMAT PE LAAKHON SALAAM

Aale Ahmed Ki Azmat Pe Laakhon Salaam
Ibne Haider Ki Rif'at Pe Laakhon Salaam

Mustafa Ke Dil o Jaan Hussain o Hasan
Nau-jawaanane Jannat Pe Laakhon Salaam

Hum Shabih e Nabi Akbar e Mahjabeen
Noor Walon Ki Soorat Pe Laakhon Salaam

Jo Sahaabi Bhi Hai Aur Nawaase Bhi Hai
Unki Tauqeer o Nisbat Pe Laakhon Salaam

Khoon Se Karbala Jin ke Sairaab Hai
Un Shaheedon Ki Azmat Pe Laakhon Salaam

Jin Se Khush Hai Khuda Aur Khuda Ka Nabi
Unki Taabinda Qismat Pe Laakhon Salaam

Chhod Kar Apna Khutba Liya Goad Mein
Noor e Ain e Risaalat Pe Laakhon Salaam

Jisne Karbal Mein Zinda Kiya Deen Ko
Uski Shaan e Shuja'at Pe Laakhon Salaam

